

La «scoula industriala» resta perseveranta

Daspö l'on 1929 es la «Scoula industriala Val Müstair» ün toc da Sta. Maria. Cun 14 scolars es quai üna da las plü pitschnas scoulas da la Svizra. Il recter Fausto De-Stefani, chi vaiva surtut la scoula dal 2009, discuorra da l'avegnir da la scoula.

Valentina Baumann

Id es ün marcurdi davomezzi. Set mattas tschaintan in üna da las trais stanzas da scoula. Quai para una stanza d'art. Dapertout sun culurs süllas maisas, i vain taglià oura palperi per fumar mustras. Ellas fan ün giarsunadi da tessunzas. La «Scoula industriala Val Müstair» es l'unica scoula in tuot la Svizra, ingio chi's po far la scoula da giarsunadi da tessunza. Las scolaras vegnan per part dad otras parts da la Svizra, dafatta inchün da la Germania sezza vi d'üna maisa. «Minchatant vegnan discurrudas traiss lingus in üna stanza», ria Fausto De-Stefani, il recter da la scoula industriala. Trais jadas l'on, in october, schnier e mai, vegnan las scolaras a Sta. Maria per ün bloc da scoula chi düra duos eivnas. Ma per giarsunadis sco falegnam o electriker es scoula mincha lündeschdi. Quels giarsuns vivan illa Val Müstair. In tuot sun quai tschinich quist on. Il manader da scoula speresha, cha la scoula possa survivver in quist möd eir in avegnir.

Pitschna scoula – pacs scolars

Quist on visitan 14 scolars la scoula industriala jaura. Nou tessunzas chi vegnan a Sta. Maria per blocs, duos da quellas fan üna scolaziun da crescüts, e tschinich giarsuns chi fan lur giarsunadi illa Val Müstair. Electrikers o louvaplattinas nu daja quist on ingüns, ma uschè lönci chi dà scolars daja eir üna scoula industriala. «Üna jada vaina gnü desch scolars in tuot. Plü pac sco desch füss critic per nossa scoula. La scoula exista be causa cha nus vain ils cuors da bloc», disch il recter da la scoula, Fausto De-Stefani. «Nus vessan gugent daplüs scolars, ma blers patrunz da l'Engiadina tramettan lur giarsuns a Cuoira. Nus vessan plaschairscha inchün tramettess seis giarsuns pro nus.» De-Stefani nun es sgür da l'avegnir chi spetta la scoula jaura, «eu speresch simplamaing ch'eu poss surdar la responsabilità per la scoula in buns mans», disch el. In trais ons il plü tard stuvess el nempe surdar sia lavur sco recter. A las tessunzas nu disturba il pitschen nomer da scolars. «Uschè pudaina avair daplü contact direct cul magister ed eir nus scolaras eschan automaticamaing plü dastrusch.»

Plurilinguità

Eir scha'l's giarsuns chi visitan la scoula mincha lündeschdi sun da la Val Müstair, deriva üna gronda part da las tessunzas d'otras parts da la Svizra o dafatta da la Germania. Discurrü vain almain duos lingus – tudais-ch e frances, minchatant eir talian. «Savar discorrer plüssas lingus es üna cundizion per pudair esser magister quia», disch la magistra Gaby Itin. Ella sto preparar svess seis föglis da lavur. Quels ston esser plurilings. Tenor De-Stefani po quai esser stantus pel scolar da stuvair gnir fin illa Val Müstair. Üna scoula plü centrala füss plü agreebla per tschertüns. Ma Fausto De-Stefani es cuntant da pudair instruir las tessunzas a Sta. Maria. «Sainza las tessunzas füssa fich difficil da tgnair quista scoula industriala in vita.» Il lò ha però eir avantags, la natüra e las culuors impüstü d'utuon sun inspirantas per üna lavur uschè creativa. «Oter co cha la scoula es fich dalönci davent da chasa, am plascha quai fich bain in Val Müstair», disch üna scolara.

Infrastructura ed urari

La scoula industriala ha plaza sün ün plan dal stabilimaint immez Sta. Maria. Quia daja la stanza da computers, la stanza da magisters, üna stanza per ils giarsunadis chi vain dovrada mincha lündeschdi ed üna stanza per las tessunzas. Ün internat nun exista, las scolaras stan pro amis o in AirBnBs. Ils magisters chi dan scoula sun in tschinich e lavuran eir in otras scoulas, siond cha quai es be üna plaza da 20 fin 30 per tschient.



Las scolaras dovran culurs e palperi per las lezhas illa scoula industriala. La scolaziun da tessunza es üna lavur creativa. fotografias: Valentina Baumann

Anzeigen

Quai da duos magistras per las tessunzas, üna instruischa la bunura ed üna la davomezzi, ün magister instruischa ils falegnams, ün ils electrikers, chi da eir scoula da matematica, ün per müraders e louvaplattins ed ün chi instruischa ABU, dimena fuormaziun generala, chi vain instruida a tuots. «Quist nomer es il maximum. Avair daplü magisters nu rendess», disch De-Stefani.

Ed eir ils uraris sun specials. Ils scolars da tuot ils ons da giarsunadi vegnan instruits insemel. «Minchatant stuvain instruir a duos gruppas – prüm on da giarsunadi e seguond on – ed amo in duos lingus – tudais-ch e frances», declara Gaby Itin. Il manader da scoula nu sa da dir, scha la scoula ha ün grond avegnir. Uschè sco ch'ella exista uossa, saja quai amo realisabel. El as giavüscha daplü scolars, ma finalmaing es la pitschna grondezza quai chi characterisescha la scoula. Ella es speciala e grazcha a quai eir cuntschainta in tuot il Chantun o dafatta in tuot la Svizra.

www.si-valmuestair.ch